

25 AÑA DI KAPEL MONTE CALVARIO



ORANJESTAD(AAN) -- Dia 31 di Maart venidero pueblo di Tanki Leendert ta recorda e hecho cu 25 aña pasa Monseñor J.M. Holterman den un ceremonia impresionante a bendiciona Kapel Monte Calvario y asina inaugure oficialmente.

Construccion di e kapel aki tabata posible danki na e deseo di Monseñor Holterman q.e.p.d. cu a mira e necesidad di un "Cas di Oracion" den un pueblo creciente; e dina-

mismo, entusiasmo y empeño cu Padernan R.H. Nooyen y Leo v.d. Vaart a pone tras di e proyecto; esfuerzo di e Comité Kerkbouwfonds Tanki Leendert consistiendo di Elias Fingal, Hyacintho Erasmus, Joseph Fingal, Simoen Faro, Agatha Erasmus, Antonio Fingal q.e.p.d., Fancisco Dijkhoff q.e.p.d. y Rudy Dijkhoff q.e.p.d., e generosidad di e comunidad Arubano en general y e pueblo di Tanki Leendert en

particular cu a contribui grandemente pa construccion di e kapel.

E pueblo di Tanki Leendert ta grandemente agradecido tambe na Hyacintho Erasmus y su sra. Feliciano q.e.p.d. kendenan a regala e tereno riba cual e kapel ta construi; na M.J. Sint Jago ken a diseña e Kapel y Louis Browne di Cooperacion Technico Arubano ken tabatin supervision riba construccion di e kapel.

Tabata na aña 1962 cu Monseñor Holterman a indica e deseo di construi un kapel pa e pueblo di Tanki Leendert cu den e tempo ey tabata duna señal di crecimiento. Na momento cu e noticia a sali cu un kapel ta bay worde construi

na Tanki Leendert, familia Hyacintho Erasmus spontaneamente a ofrece di obsequia Bisdom tereno suficiente pa construccion di e kapel y su parkeerplaats.

Na e mesun tempo un comite a worde crea pa cuminsa recauda fondo pa su construccion. Tur hende cu a worde acerca pa un contribucion a hacie cu gusto.

Pesey, cu no ta por nada cu na ocasion di ponemento di promer piedra dia 21 di Mei 1967, Monseñor Holterman orguyosamente a remarca cu "danki na e contribucion royal di e comunidad Antiyano y e pueblo Arubiano tabata posible pa esaki ta e di nueba misa o kapel cu ta worde construi den su corto periodo di dies aña como Obispo".

Cu inauguracion di Kapel Monte Calvario Tanki Leendert a mira un crecimiento durante e añanan cu a sigui te cu awe e tin su mes basis y kleuterschool, un Centro di Bario moderno, varios restaurant, service station, casnan bunita y diferente otro cosnan como muestro di progreso.

En vista cu e di 25 aniversario di Kapel Monte Calvario ta cay den tempo di Cuaresma a ser dicidi cu celebracion di e aniversario aki lo tuma lugar dia 18 di April 1993 cu un Santo Sacrificio di Misa y un recepcion chikito unda tin oportunidad pa felicita e pueblo na ocasion di e hubileo aki.